

**05 APRILIE**

**ACATISTUL  
SF. CUVIOȘI-MUCENICI  
VASILE ROSLIAKOV,  
TROFIM TATARNIKOV  
ȘI TERAPONT PUȘKAREV  
DE LA OPTINA**

**ACATISTIER-RU**



# Ака́фист

## три́ем Опти́нским бра́тиям, на Па́сху уби́енным, иеромо́наху Васи́лию, ино́ку Ферапо́нту, ино́ку Трофи́му

### Конда́к 1

Избра́нным сыно́м ста́рцев Опти́нских, Святы́я  
Тро́ицы тричи́сленным служи́телем, а́гнцем  
закла́нным на Па́сху Госпо́дню и дерзнове́ние  
добропобе́дное улу́чившим, похва́льная  
принесе́м пе́ния; вы же воздви́гните нас от  
гробо́в нераде́ния, с любо́вию вам  
зову́щих: Ра́дуйтесь, три́е новому́ченицы  
Опти́нстии, Христа́ Воскресе́шаго пропове́дницы.

### И́кос 1

А́нгельскому жити́ю подража́ти жела́юще,  
по́двигом му́ченическим в оби́тели Опти́нстей  
проси́яли есте́, жизнь свою́ за Христа́ отда́вше,  
ны́не же в невече́рном дни Ца́рствия Бо́жия с  
му́чениками ликовству́юще, услы́шите нас,  
по́мощи проси́ящих и в моли́тве к вам вопи́ющих:  
Ра́дуйтесь, ра́дости Воскресе́ния  
провозвесе́тницы;

Ра́дуйтеся, Опти́нских ста́рцев насле́дницы.  
Ра́дуйтеся, благода́ти Бо́жия сосу́ди избра́ннии;  
Ра́дуйтеся, златокова́ныя трубы́ Пасха́льныя.  
Ра́дуйтеся, ра́нами свои́ми де́монов уязви́вшии;  
Ра́дуйтеся, трезво́ном Пасха́льным диавола  
оглуши́вшии.  
Ра́дуйтеся, венцено́сцы Великопо́стническаго  
по́прища;  
Ра́дуйтеся, знаменонóсцы Пасха́льнаго А́гнца.  
Ра́дуйтеся, меченóсное небес прехожде́ние;  
Ра́дуйтеся, Крестовоскрéсныя сла́вы явлéние.  
Ра́дуйтеся, три́е новомученицы Опти́нстии,  
Христа́ Воскрéсшаго проповéдницы.

### Конда́к 2

Тро́ица Всеблагáя и Благопромыслíteльная от  
разли́чных концев земли́ ру́сския собра́ вас,  
отцы́ преподо́бнии, в оби́тель Опти́нскую, е́же  
просла́вити вы в ли́це мучеников тричи́сленных,  
на Па́сху уби́енных, да еди́ними усты́ поёте  
песнь трегу́бо песносло́вимую: Аллилу́ия.

### И́кос 2

Христа́ Воскрéсшаго срéтити всем се́рдцем  
возжде́льше, ина́го жити́я, кроме́ ино́ческаго не  
пожелáли есте́, пе́рвии насéльницы  
возрожда́ющияся пу́стыни яви́стеся, труда́ми

мно́гими себе́ смиря́юще и стра́сти  
умершвля́юще, по́двигом сво́им стéну  
неразорíмую обíтели О́птинстей созíждали  
естé, сегó ра́ди благодарственнó воспевáем вам  
сйце:

Ра́дуйтесь, на нй́ве Христо́ве порабо́тати  
прише́дшии;

Ра́дуйтесь, ра́лом страда́ния зéмлю сéрдца  
возде́лавшии.

Ра́дуйтесь, жити́ем ста́рцев О́птинских себе́  
назидáвшии;

Ра́дуйтесь, равноа́нгельную жизнь достíгнути  
возжелáвшии.

Ра́дуйтесь, служб́ церкóвных рачíтельнии  
моли́твеницы;

Ра́дуйтесь, трудолю́бия нелéностнии  
подви́жницы.

Ра́дуйтесь, я́ко вертогра́д о́птинский украша́ете  
цветáми нетлéния;

Ра́дуйтесь, я́ко гробни́цу ва́шу зи́ждете, я́ко  
Куву́клию Воскресéния.

Ра́дуйтесь, светозáрнии лучи́ восходя́щия Пáсхи;

Ра́дуйтесь, блаже́ннии причáстницы Христо́вы  
Стра́сти.

**Р**а́дуйтесь, три́е новомученицы О́птинстии,  
Христа́ Воскрéсшаго проповéдницы.

### Конда́к 3

Во оби́тель дрéвнюю прише́дше, у моги́л  
О́птинских ста́рцев моли́лися естé, да укреплéни  
бúдете у́зким путéм шéствовати; просвещéни же  
бывше Дúхом Святы́м, мир сей оста́вили естé, и  
го́рняго Отéчества достíгнути желáюще, воспéли  
благодáрственную песнь Бо́гу: Аллилу́ия.

### И́кос 3

Име́юще в сердца́х свои́х благоé желáние  
рабо́тати Го́сподеви, ре́вностно воору́житесь  
проти́ву ми́ра, диа́вола и страсте́й, по́двигом  
и́ноческим себе́ преда́сте, от си́лы возраста́юще  
в си́лу; семú ва́шему до́брому жити́ю внима́юще,  
благодáрственно вам вопи́ем:

Ра́дуйтесь, рачи́телие те́плаго пока́яния;

Ра́дуйтесь, искорени́телие хла́днаго отча́яния.

Ра́дуйтесь, мертволéпное страсте́й умерщвлéние;

Ра́дуйтесь, живонóсное добродéтелей  
процветéние.

Ра́дуйтесь, на Па́сху Господню́ умрéти  
желáвшии;

Ра́дуйтесь, сме́ртию смерть во Христé  
попра́вшии.

Ра́дуйтесь, блаже́ннии уча́стницы пéрваго  
Воскресéния;

Ра́дуйтесь, благоприча́стницы несконча́емаго

весéлия.

Рáдуйтеся, я́ко талáнты, от Бóга вам дáнные, в зéмлю не сокрывшии;

Рáдуйтеся, я́ко грóбы вáша сокрóвищем нетлéния обогатившии.

Рáдуйтеся, триé новомученицы Оптинстии, Христá Воскрéсшаго проповéдницы.

#### Кондáк 4

Вся сýетная и лóжная в мíре врéменнем познáете, на рáло рúки вáша возложíte, я́ко и́стиннии воздéлователи нíвы Христóвы; трудóм и́ноческим себé предáли естé, молítву и пóдвиги не я́ве, но тáйно творя́ще, не челóвеческия слáвы взыскýюще, но слáвы Бóжия песнь хвалéбную пою́ще Бóгу: Аллилу́ия.

#### И́кос 4

Жити́ем старческим обíтель святая прослáвленная, безбожники же разорéнная, и́ноческим жити́ем пáки процветé и от разорéния и пéпла воздв́ижеся, венцём же новомученическим ны́не венча́ется и красóтами страсотéрпческими украша́ется, сего́ рáди восхваля́ем вас сýще:

Рáдуйтеся, обéтов мона́шеских печáти златозáрнии;

Ра́дуйтеся, ве́ры правосла́вныя а́даманти  
троегра́ннии.

Ра́дуйтеся, в невидимей бра́ни ино́цы  
непоколеби́мии;

Ра́дуйтеся, ору́жницы Христо́вы непреобори́мии.

Ра́дуйтеся, ду́ши ва́ша на всякую скорбь  
угото́вившии;

Ра́дуйтеся, телеса́ ва́ша в же́ртву живу́ю  
предста́вившии.

Ра́дуйтеся, преподобномучеников о́птинских  
прее́мственная сла́во;

Ра́дуйтеся, новомучеников ру́сских предивная  
добро́то.

Ра́дуйтеся, я́ко серпо́м страда́ния пожа́ти бы́сте  
в богоизбра́нныя кла́сы;

Ра́дуйтеся, я́ко угобзи́сте О́птинскую ни́ву  
новомученической лётораслию.

**Ра́дуйтеся**, три́е новомученицы О́птинстии,  
Христа́ Воскрёсшаго пропове́дницы.

### Конда́к 5

**Ж**ити́е своё по завету ста́рцев О́птинских между́  
стра́хом и наде́ждою проводи́вшии, о Ца́рствии  
Небе́сном и му́ках а́дских вы́ну помышля́вшии,  
непреле́стный путь ино́ческаго де́лания обрели́  
есте́. Те́мже, я́ко сы́нове све́та, вопи́ете Со́лнцу

Правды Христу́, разорившему греховную  
тьму: Аллилу́ия.

### Икос 5

Блаженную жизнь избра́сте, преподо́бнии отцы́,  
е́же жи́ти бра́тии вку́пе в дому́ Бо́жием, в  
обитель Опти́нскую всели́лися естé, обáче го́рних  
обителей дости́гнути жела́юще, по ле́стнице  
добродéтелей восхожде́ние в сердца́х сво́их  
положи́сте. Те́мже я́ко ева́нгельских блаже́нств  
дости́гших, ублажа́ем вас си́це:

Ра́дуйтесь, нищету́ духо́вную возлюбившии;

Ра́дуйтесь, слеза́ми оде́жду ду́ш убели́вшии.

Ра́дуйтесь, земли́ кро́тких насле́дницы;

Ра́дуйтесь, правды Христо́вы споспéшницы.

Ра́дуйтесь, поми́лование улучившии ра́ди жи́зни  
же́ртвенныя;

Ра́дуйтесь, Богозри́тели ра́ди чистоты́  
сердечныя.

Ра́дуйтесь, я́ко брань страсте́й на́ших  
умиротворя́ете;

Ра́дуйтесь, я́ко ми́ром сим гони́мии, Не́бо  
насе́яете.

Ра́дуйтесь, стяжавшии Ца́рство Небе́сное;

Ра́дуйтесь, возше́дшии в Ра́дость Воскрéсшаго.

Ра́дуйтесь, три́е новомученицы Опти́нстии,  
Христа́ Воскрéсшаго проповéдницы.

## Конда́к 6

Труда́ми мно́гими по́честей в ми́ре дости́гл еси́, о́тче Васи́лие, и тщету́ уразумёв сла́вы челове́ческа, во́ли Бо́жия исполните́лем соде́лался еси́, и тала́нты тебе́ Бо́гом да́нныя преумно́жил еси́, про́поведию и духо́вными стиха́ми, я́коже ста́рец Варсоно́фий, к пока́йнию наро́д ру́сский призыва́л еси́, науча́я воспева́ти Бо́гу: Аллилу́ия.

## И́кос 6

Ве́дый, я́ко па́стырство есть сугу́бое со Христо́м сораспя́тие, взем крест послéдовал еси́ Христу́, и мно́гим и́щущим утешéния па́стырем до́брым яви́лся еси́, врачу́я ду́ши благода́тию Бо́жией; мы же тебе́ и дво́ице и́ноков, я́ко а́гнцам твоего́ му́ченическаго ста́да, воспева́ем си́це:

Ра́дуйтесь, жезло́м креста́ диа́вола порази́вшии;  
Ра́дуйтесь, свирéлию ва́ших моли́тв па́ству возвесели́вшии.

Ра́дуйтесь, священником похвало́ и и́ноком утвержде́ние;

Ра́дуйтесь, преподо́бных красото́ и му́чеников укрепле́ние.

Ра́дуйтесь, треплетéнная ве́рве нелицеме́рнаго братолю́бия;

Ра́дуйтесь, тристо́лпное основа́ние

непрелѣстнаго боголюбія.

Рáдуйтеся, я́ко у ва́ших гробóв дúши нáша  
оживля́ются;

Рáдуйтеся, я́ко ва́шим предста́тельством стра́сти  
нáша умерщвля́ются.

Рáдуйтеся, дрéвних мúчеников подража́телие;

Рáдуйтеся, новомúчеников равносто́ятеліе.

Рáдуйтеся, три́е новомúченицы Оптинстии,  
Христа́ Воскрéсшаго проповéдницы.

### Конда́к 7

Вся кра́сная міра сегó ни во что́ же вмени́в,  
крóтостию и молчали́востію украси́лся еси́, óтче  
Ферапо́нте, сегó ра́ди в покая́ние, я́ко в рíзу  
спасéния обléклся и в Оптину пу́стынь к  
пóдвигом духо́вным устреми́лся еси́, и от  
Го́спода венéц мúченический при́яти сподо́бился  
еси́, благода́рно поя́ Бо́гу: Аллилу́ія.

### И́кос 7

Жити́ю святы́х потща́лся еси́ подража́ти, óтче  
Ферапо́нте, по́стничеством и бде́нием, я́ко  
щито́м, огради́лся еси́, моли́твою же Иису́совою,  
я́ко духо́вным мечéм, непреста́нно во уме́  
враща́емым, главу́ зми́я сокруши́л еси́ и  
победоно́сным во́ином Христо́вым яви́лся еси́,  
сегó ра́ди ско́рым помо́щником тебе́ в моли́тве

призыва́ющим явля́ешься. Приими́ же с  
брати́ями-му́чениками твои́ми  
благодáрственныя сия́ хвалы́:

Ра́дуйтеся, я́ко предобручи́теся Христу́  
и́ноческим жити́ем;

Ра́дуйтеся, я́ко предочи́стилися естé моли́твою и  
посто́м.

Ра́дуйтеся, па́жить Опти́нскую му́ченическою  
кро́вию удобри́вшии;

Ра́дуйтеся, ва́иями Пасха́льнаго ликовáния сию́  
укра́сившии.

Ра́дуйтеся, три́е о́трасли лозы́ Христо́вы  
страда́ньми процвётшии;

Ра́дуйтеся, от духо́внаго точи́ла вино́ умилéния  
извёдшии.

Ра́дуйтеся, на свéщнице Божéственнем  
возжéннии свети́льницы;

Ра́дуйтеся, на твёрди́ Церко́вней трисия́нии  
му́ченицы.

Ра́дуйтеся, и́миже и́ночестии ч́ни  
утвержда́ются;

Ра́дуйтеся, и́миже ду́ши вёрных укрепля́ются.

**Р**а́дуйтеся, три́е новому́ченицы Опти́нстии,  
Хри́ста Воскрéсшаго проповéдницы.

## Конда́к 8

Ко Творцу́ всяческих любóвию воспламени́вся, во всех челове́цах, óтче Трофи́ме, óбраз Бо́жий вы́ну зрети́ сподо́бился еси́, сего́ ра́ди в поте лица́ твоего́ труды́лся еси́ на блага́ бли́жняго, милосе́рдием и сострада́нием виноградник се́рдца твоего́ украша́я и в ра́дости Го́сподеви взыва́я: Аллилу́ия.

## И́кос 8

Ревну́я поревновáл еси́, óтче Трофи́ме, о е́же стяжа́ти се́рдце ми́лости испо́лненное, сего́ ра́ди не стúден, а горя́щ быв на дела́ Бо́жия и теплохла́дность душе́вную отрину́л еси́. За таково́е твоё духо́вное раче́ние прославля́ем тя с спострада́вшими бра́тиями и благода́рственно воспева́ем вам си́це:

Ра́дуйтесь, я́ко церко́вную красоту́ созида́ете;

Ра́дуйтесь, я́ко мирску́ю суету́ упраздня́ете.

Ра́дуйтесь, Опти́ны пу́стыни живоже́ртвенное заколе́ние;

Ра́дуйтесь, Христу́ подража́тельное в ре́бра прободе́ние.

Ра́дуйтесь, лампы́ неугаси́мая бде́ний непреста́нных;

Ра́дуйтесь, кади́льницы благово́нныя молитвосло́вий сла́дких.

Ра́дуйтеся, по́стническаго по́прища крѣни  
присноцвету́щи;  
Ра́дуйтеся, Пасха́льныя ра́дости ре́ки  
приснотеку́щи.  
Ра́дуйтеся, я́ко духо́вным весѣлием нас  
напая́ете;  
Ра́дуйтеся, я́ко печа́ль мирску́ю изсуша́ете.  
Ра́дуйтеся, три́е новомученицы Оптинстии,  
Христа́ Воскрѣсшаго проповѣдницы.

### Конда́к 9

Звонари́ иску́снии, Ферапо́нте и Трофи́ме,  
ра́дость Воскресѣ́ния Христо́ва ми́ру  
благовеству́юще, я́ко созрѣ́вшии сно́пы пожа́ти  
бы́сте, и от трудо́в земныхъ вкúпе с отце́м  
Васи́лием в житни́цу Небе́сную угобзи́лися есте́,  
и я́ко сла́дкий хлебъ Трѣ́ице Святе́й принесóстеся,  
песнь воспева́юще: Аллилу́ия.

### И́кос 9

Де́лом позна́сте, я́ко любви́ жѣртвенна есть,  
темже Христу́ сораспя́лися есте́, мечѣм  
закала́емии, и кро́вию свое́ю не то́кмо ду́ши  
сво́я убели́ли, но и на́ша сердца́ окаменѣ́нныя  
умягчи́ли есте́, сегó ра́ди с любóвию воспева́ем  
вам си́це:  
Ра́дуйтеся, звѣ́нницы монасты́рския незрѣ́мое

украше́ние;

Ра́дуйтеся, мона́шескаго любому́дря  
сладкагла́сное песнопéние.

Ра́дуйтеся, криле́ голуби́не псаломски  
стяжа́вшии;

Ра́дуйтеся, на го́ры боговéдения те́ми  
возлетéвшии.

Ра́дуйтеся, о Страда́ниях Господних вьну  
помышля́вшии;

Ра́дуйтеся, за Триднёвно Воскрéсшаго триеди́но  
умёршии.

Ра́дуйтеся, му́ченическою кро́вию своёю  
омы́вшиися;

Ра́дуйтеся, в виссо́н пра́ведности велеле́пно  
оде́вшиися.

Ра́дуйтеся, сме́рти да́вшии Пасха́льное  
целова́ние;

Ра́дуйтеся, доста́вившии врагу́ мно́жество  
рыда́ний.

Ра́дуйтеся, три́е новому́ченицы О́птинстии,  
Христа́ Воскрéсшаго проповéдницы.

### Конда́к 10

Посещéния преподо́бнаго Амвро́сия  
сподобивыйся, о́тче Васи́лие, да укреплén  
бúдеши пред искуше́нием вели́ким, вью́ свою́  
Господеви преклонíл еси́, глаго́ля: — мне на

Пáсху умрѣти вожделѣнно есть — и на заклáние вкúпе с Ферапóнтом и Трофíмом послéдовал есѝ, воспева́я пeснь Бóгу: Аллилу́ия.

### И́кос 10

Лозá Истинная израстѝ вас, я́ко грóздие сладча́йшии в вертогра́де Оптинстем, отцы́ всечестнѝи Васи́лие, Ферапóнте и Трофíме; Крóвию Божѣственнойю напоѣннии, в рѣбра богоненавѝстно прободѣннии, в страдáнии ва́шем изгнетáете, я́ко от точíла, струй Божѣственнаго рáдования, утешáюще всех вопи́ющих к вам таковáя:

Рáдуйтесь, Оптинскаго лúга райское прозябѣние;  
Рáдуйтесь, аромáти богоприятнѝи молѝтвы и умилѣния.

Рáдуйтесь, сóты храня́щии умную сла́дость;  
Рáдуйтесь, óблацы крапя́щии неземнúю рáдость.

Рáдуйтесь, ча́ши испóлненныя íноческаго пла́ча;

Рáдуйтесь, фиáлы радостотвóрной по Бóзе печáли.

Рáдуйтесь, сердѣчнаго вертогра́да цветнѝк неувядáемый;

Рáдуйтесь, Иисúсовы молѝтвы истóчник богозна́емый.

Рáдуйтесь, íмиже сла́дость добродѣтелей

воспева́ется;  
Ра́дуйтесь, ѿмиже го́речь скорбе́й истребля́ется.  
Ра́дуйтесь, три́е новому́ченицы Оптинсти́и,  
Христа́ Воскресе́шаго пропове́дницы.

### Конда́к 11

Дре́вний змий, ненави́стию к ро́ду  
челове́ческому разжигáемый, потща́ся вас  
умертви́ти, благове́стников Воскресе́ния  
Христо́ва, отцы́ богоно́снии, а́ще и сосу́ды плоти́  
ва́шея растерза́, оба́че жа́ло зло́бы своея́ то́кмо  
притупи́, душ же ва́ших не возмо́же улови́ти,  
песнь побéдную Воскресе́шему Христу́  
пою́щих: Аллилу́ия.

### И́кос 11

Пу́стынь Оптинскую ны́не святоле́пно  
украша́ете, телесы́ же нетле́нными воскресе́ние  
ме́ртвых возвеща́ете, новому́ченицы Оптинсти́и  
Васи́лие, Ферапо́нте и Трофи́ме, главу́ зми́я,  
уязви́вшаго вас, весе́лыми нога́ми содро́сте и в  
Го́рнее пра́здновати ве́чную Па́сху востекли́  
есте; посети́те ны, грешны́я, ва́шею моли́твою, и  
от зло́бы диа́вола изба́вите воспева́ющия вам  
сицевáя:  
Ра́дуйтесь, Го́рняго Иерусали́ма насельни́цы;  
Ра́дуйтесь, христокра́снии Пасха́льнии

трисвѣщницы.

Рáдуйтеся, сынове Оптинских старцев  
избрáнии;

Рáдуйтеся, Цѣркве Христо́вы ча́да благона́внии.

Рáдуйтеся, трисвѣтлая вы́сотó моли́твеннаго  
восхожде́ния;

Рáдуйтеся, трилюбѣзная глуби́но́ иноческаго  
уединѣ́ния.

Рáдуйтеся, кла́дези испо́лненнии духо́вными  
дарова́ниями;

Рáдуйтеся, стру́и игра́ющия Пасха́льными  
ра́дованиями.

Рáдуйтеся, я́ко чудес де́лателище часо́вня ва́ша  
явѣ́ся;

Рáдуйтеся, я́ко в нетле́нную сла́дость грóби ва́ша  
претвори́шася.

Рáдуйтеся, три́е новомученицы Оптинстии,  
Христа́ Воскресшаго проповѣ́дницы.

### Конда́к 12

Благода́ть Бо́жию обильно на вас излия́нную  
свѣду́ще, я́ко и по сме́рти не престаёте источа́ти  
чудеса́ от гробо́в ва́ших, те́мже мо́лим вас я́ко  
проповѣ́дников Воскресѣ́ния Христо́ва: оживи́те  
нас умершвлѣ́нных ду́шею, да возста́вше от сна  
грехо́внаго в ра́дости духо́вней взыва́ем Христу́  
Воскресите́лю ме́ртвых: Аллилу́ия.

## Икос 12

Пою́ще и сла́вяще ва́ше богоуго́дное жити́е и му́ченическую смерть Христа́ ра́ди, ве́даем, я́ко а́ще и мно́жество сложи́ли бы́хом песнопéний, не дово́льно бу́дет восхваля́ти вся сла́вная и вели́кая, я́же Госпо́дь в вас просла́вивыйся сотвори́, но я́ко благодарна́я ча́да во умилéнии серде́ц вопи́ем к вам такова́я:

Ра́дуйтесь, я́ко Умертви́вшемуся за всех соумира́ете;

Ра́дуйтесь, я́ко со Воскрéсшим Христо́м совоскресáете.

Ра́дуйтесь, но́щи Пасха́льныя светонóснии Ангели;

Ра́дуйтесь, Великосуббо́тняго поко́я невозмутíмии стра́жи.

Ра́дуйтесь, я́ко стрéлы лука́ваго далéче от нас отгоня́ете;

Ра́дуйтесь, я́ко копи́ем ва́ших моли́тв бесо́в поража́ете.

Ра́дуйтесь, в со́нме му́ченичестем за нас предстоя́телие;

Ра́дуйтесь, в собо́ре Опти́нских святы́х бли́жнии о нас ходáтаи.

Ра́дуйтесь, и́миже от гробо́в нераде́ния возставля́емся;

Ра́дуйтесь, и́миже благода́тию воскресéния

предозаряемся.

Рáдуйтеся, триé новомúченицы Оптинстии,  
Христá Воскрéсшаго проповéдницы.

### Конда́к 13

О, треблаже́ннии новомúченицы Оптинстии  
Васи́лие, Ферапо́нте и Трофи́ме, я́ко агнцы на  
Па́сху заклáннии и в ра́дость вéчную ко Христу́  
вше́дшии, испроси́те нам у Го́спода страсте́й  
умершвлéние и добродéтелей оживлéние,  
Христóви сраспя́тися и с Ним совоскрéснути и  
сподо́битися вкúпе с ва́ми воспевáти песнь  
Триеди́ному Бо́гу: Аллилúия.

Сей конда́к глаго́ли три́жды.

И па́ки чтéтся и́кос 1-й и конда́к 1-й